

45  
-LUGORE IN SA NOTTE SARDA-

Tres isteddos amigos  
segan s'iscurigore  
subra sa notte sarda  
e allegran sos coros,  
impedrados,  
de sos sardos;  
a sos diseredados  
assuttan su piantu,  
tramandadu,  
da edade in edade.  
Incredulos eterno !  
iscurtade,iscurtade  
sos isteddos,  
repitere: "est s'avrore" !-  
subra sa notte sarda seculare...  
Aberide sas giannas  
a sa dicioso sorte  
e saludade  
custa Sardigna noa  
e-i sos fizos suos,  
diventados isteddos protettores !  
Besside a sa carrera fatepare,  
chin trumbas e banderas,  
gridende s'allegria popolare;  
e de bos mossigare pari-pari  
sa pòrfia finide!  
Sardos !  
da ogni parte e logu  
torrade a sa cogone saporida!  
Torrade:  
allughide una lampana  
in ogni contonada de Sardigna,  
pro chi sos tres isteddos protettores  
agaten'iscraridu su caminu  
finas a s'avreschia.

"Soldato-Poeta"

- LAMENTU DE ORFANU -

Cando sos pilos canos fin de oro  
fin carignos pro me.  
In tantu disaogu  
bidei Mamma mia  
chin sos ojos de pedra  
e-i sa cara e chera,  
frittas che nie  
sas bellas laras suas de coraddu;  
poi,  
chena unu faeddu,  
mi lassait!  
e dae su dolore,  
finas bezzu,  
in cara, si mi paret su turmentu!  
Ahi ! forsis no fit cuntenta  
de su "tesoro" sou,  
"unicu amparu" a sas penas suas ?  
( o no fit beru  
su chi mi naraiat in pes de lettu ?! )  
No mi lasses in pena, Mamma mia!  
Torra, a s'iscurigada,  
a-i cudd'apposentu  
chi m'ideit cuntentu  
prima de ch'esser rutu in manu anzena.  
Beni !  
dami accunnortu e lughe  
in s'utturinu umbrosu de sa vida,  
dami consizu;  
beni!  
chin peg de Fada,  
lepia che umbra;  
chin sa corona in manu  
e-i su risu in laras,  
che unu die:  
cando sos pilos canos fin de oro !

"Soldato-Poeta"

-TURRE RUTA -

Turre ruta:su poveru passante,  
su nobile signore,  
idende s'umbra tua  
de prudere e de pedras cuguzada,  
naran:  
"e fis bella e superba!  
fis de tottu sos fraigos fiore...,  
fis lughe e ghia a tottu sos creentes;  
funtana armoniosa sa pius santa,  
sa pius chitulana:  
umpare a s'avreschia  
intraias in domo,nende:  
"pessa"  
Deus ti hat cunzessu atera die"...  
"Poi,  
su disaogu nostru o disaura  
chin allegros rintoccos o dolentes  
in aria faghias rimbombare:  
e fis cumpresa e amada";  
"a s'imbrunire,  
ancora premurosa,  
una pregadoria non pedias  
pro su Signore";  
"a notte arta,  
fis segnale seguru  
de ogni viazante  
e cumpanza amorosa de sas Mamas  
bizende in domo insoro".  
"Povera turre!  
in'est e it'est diventada  
sa tua galania"?  
"Disputende a sos bentos s'esistenza  
parias pro s'eternu collocada...!  
Ma de su tempus vilesa e rigore  
distruttu hat bonidade e bragheria  
e t'hat a pedra e prudere torrada:  
como ses dae tottu appeigada"!

"Soldato-Poeta"